

## Or cucù

In da natüra bèla desedada  
a riva scià in un bof d'aria delicada  
na parolina incantada, a restom lì  
cor nas insü e disom: "sent, è rivaat or cucù".

Or verso l'è vün sol, sempro quell  
facil anca par un fiöö da regordaa,  
ta sa sconfonet mia, mia bisögn  
da consültaa r'enciclopedia!

L'è r'ünic üsel ch'è bon  
da scascigaa via un mees  
par fan cominciaa n' altro  
e par lodàl ghem fai perfin una canzon.

"Cucù, cucù l'aprile non c'è più  
è ritornato maggio al canto del cucù".  
E sa sgolom in coro in piazza cora rama  
E ai altri bravi üselitt ac pensom pü.

A stem lì a scoltaa ra so vos da dova la vegn  
par savée se a dovrà piöf o se or bel temp o tegn.  
A ghè mia n'altro usèl pusee riveriit da lü  
e a fem a gara a chi car sent par prim, nüm pori cucù.

Già, parchè diic a quaidün ca l'è un cucù  
o vöö dii ca l'èn poo n'ingenuott, che l'ha capiit nagott  
e o s'èe lasaat faa sü. O ca l'è bon comè'n toch da pan, doma un po' balord  
co s'è mia ammò ncorgiü come o va or mond.

Altroché! A stem fresch sa speciom che'r cucù  
o sia un esempi da virtù.

In da gamma di püsee grant a chi pusée pinin  
a ghé mia n'altro üsel püsée malandrin.

Un poch da bon, prepotent, un üsèl fagnan  
un malcapaz che a ga ne mia n'altro compagn.  
L'ha gnanca verdü i öcc co'n comincia già a faa dagn.  
Intant, o canta domà na volta ar an

o met ar mond i ööf senza degnass da costruigh or ni  
o scbatt föra n'ööf di altri covaat e'r so' o tar pica lì.  
Comè chi fardelit bandonaat davanti ara parocchia  
o ponda on ööf bel gross in do nì d'on altra coppia.

E l'è già bèll che l'ha imparaa a parlaa daparlüü  
a dii "cucù" senza che nesün o gra' insegnaa  
Poro, sa ghè scapaa ra mam! Scià neh, par imparaa  
sta rarità, o gavrà mia bisögn da naa a'r üniversità!

Una sillaba, o def ripet, che sforz! (E che sillaba!) Par forza, s'al da faa,  
se ghè nui föra domà chela do so DNA.

E sicome ra poma la bürla mai lontan da pianta  
or neonato cucù, pena spacaat or ööf

o sa slarga fö, o fa' tücc i so comod  
o sa stira o sbradagia, o fa tütt chel co po'  
e og dà dent fin che a vün a vün  
tücc i altri ööf do ni o ià sbatü gio'.

Ma anca sti düü genidoo adotif  
as po' mia ves püsée imbesüit  
che is necorg gnanca da vé perdü i veri fiöö  
e dess i gà domà öcc e becch

par sto ültim rivaa, che l'è n'pozz  
da San Patrizi, senza font, sempro afamaa.  
E i coor comè lechee matin sira e dopmescdì  
par riempich or panscet a scto belimbüst lì.

Che pöö apena ca l'è gross aséé par goraa  
o tü sü e o va fö di ball senza ringraziaa  
oi pianta lì tücc düü stracch mort, stremaa  
come düü pori becch in sür mercaa.

L'è ancasì un vilan, un maledücaa  
invece da imparaa da lor comè na mam e'n pà  
i dovressa faa! No. Ogni volta o pert or ocasion  
para prèssa da naa a perpetuaa ra so progenie da lazzaron.

Epür epür epür guai se a primavera ar sentaresom pü  
con tücc i so difett, a sareem sempro lì a speciaal  
a fa a gara a chi car sent par prim, e guai sogh füdess pü  
a podaresom mia staa senza 'r noss cucù.